

आकाशवाणी जयपुर-अजमेर
प्रादेशिक समाचार।

- राष्ट्रपति द्रौपदी मुर्मू संसद री संयुक्त बैठक ने सम्बोधित कर्यो-वणा कह्यो की सरकार पेपर लीक री निष्पक्ष जांच अर दोषियां खातिर कड़ी सजा पक्की करणे वास्ते प्रतिबद्ध।
- मुख्यमंत्री भजनलाल शर्मा झुंझुनूं मांय सामाजिक सुरक्षा पेंशन योजना रे तैत बढ़ी रकम ने लाभार्थियां रा खातां मांय ऑनलाइन हस्तांतरण कर्यो।
- चिकित्सा महकमो विश्व जनसंख्या दिवस रे मौके माथे म्हीनेभर जागरूकता गतिविधियां चलावेला।
- दक्षिण-पश्चिम मॉनसून राजधानी जयपुर पहुंचो-अगले 3-4 दिनां मांय मॉनसून रे और केई ठौड़ां माथे सक्रिय होणे रा आसार।

0000

राष्ट्रपति द्रौपदी मुर्मू कह्यो है कि सरकार पेपर लीक री निष्पक्ष जांच अर दोषियां खातिर कड़ी सजा पक्की करणे वास्ते प्रतिबद्ध है। संसद री संयुक्त बैठक मांय आप रे संबोधन मांय वणा कह्यो की दलगत राजनीति सुं ऊपर उठ र ऐड़ी घटनावां ने रोकणे खातिर देशभर मांय ठोस कदम उठाणा खास है। वणा कह्यो की सरकार परीक्षा-संबंधित निकायां, वाणा कामकाज अर परीक्षा प्रक्रिया रा सगळा पहलुवां मांय मोटा सुधारां री दिशा मांय काम कर री है।

राष्ट्रपति कह्यो कि नुवी सरकार आवता संसद सत्र मांय आप रो पैलो आम बजट पेश करणे जा री है, आ वाणी **दूरगामी नीतियां** अर **भविष्यवादी दृष्टिकोण** रो एक प्रभावी दस्तावेज व्हेला अर सुधारां ने तेजी सुं आगे बधायो जावेला। अर्थव्यवस्था री मजबूती माथे राष्ट्रपति मुर्मू कह्यो कि केंद्र विनिर्माण, सेवाओं अर कृषि ने समान महत्त्व दे रह्या है। वणा कह्यो की देश सूचना प्रौद्योगिकी सुं ले र पर्यटन अर स्वास्थ्य हर खेतर मांय आगे आर उभर रह्यो है। इण सुं घणी संख्या मांय रोजगार अर स्वरोजगार रा नुवां मौका पैदा हो रह्या है।

कृषि खेतर दी गई प्राथमिकतावां ने सूचीबद्ध करता थकां राष्ट्रपति कह्यो कि केंद्र सहकारी खेतर मांय दुनिया री सब सुं बड़ी भंडारण खमता बणाणे री योजना मांथे काम सरू कर दियो है। वणा भारतीय शहरां ने दुनिया मांय सर्वोत्तम रहणे री जगह बणाणे री सरकार री प्रतिबद्धता भी दोहराई है। आप रे लगे टके एक घंटे रे संबोधन मांय राष्ट्रपति मुर्मू बुनियादी ढांचे रे विकास खातिर सरकार री पहल माथे भी प्रकाश डाल्यो अर कह्यो की प्रधानमंत्री ग्राम सड़क योजना रे तैत लारला दस बरसा मांय तीन लाख 80 हजार किलोमीटर सुं बत्ती ग्रामीण सड़कां रो निर्माण कर्यो गयो है।

000

मुख्यमंत्री भजनलाल शर्मा आज झुंझुनूं मांय **सामाजिक सुरक्षा पेंशन योजना** रे तैत बढ़ी रकम रो ऑनलाइन हस्तांतरण कर्यो। मुख्यमंत्री बटन दबा र प्रदेश रा 88 लाख 44 हजार लाभार्थियां रा खाता मांय 1 हजार 38 करोड़ रुपया सुं बत्ती री रकम ट्रांसफर करी तो सभागार तालियां सुं गूंज उठ्यो।

कार्यक्रम मांय बोलता थकां मुख्यमंत्री कह्यो की भाजपा जको वादो कर्यो बिने वां री सरकार तेजी सुं पूरा करणे मांय जुटी है।

वणा कह्यो की **सामाजिक सुरक्षा पेंशन** सुं लाभार्थी आप री बुनियादी आवश्यकता पूरी कर सकेला। इण सुं बुजुर्ग, विशेष योग्यजन, विधवा महिलावां सम्मानजनक जीवन जी सकेला। वणा कह्यो की समाज री अंतिम पंक्ति रे मिनख ताई फायदो पहुंचणो प्रधानमंत्री नरेंद्र मोदी रो मूलमंत्र है। प्रदेश रा सगळा जिलां मांय भी मुख्यमंत्री रे ईण कार्यक्रम सुं योजनां रा लाभार्थी जुड्यां। इण रे चालता ज़िला स्तरीय कार्यक्रमं मांय न्यारा-न्यारा मंत्री अर वरिष्ठ अहलकार मौजूद रह्या।

000

सेवानिवृत **न्यायाधीश गंगाराम मूलचंदानी** ने मानवाधिकार आयोग रो अध्यक्ष नियुक्त कर्यो ग्यो है। राज्यपाल कलराज मिश्र वाणी नियुक्ति रा हुकम जारी कर दिया है। **भारतीय पुलिस सेवा** रा सेवानिवृत अहलकार अशोक गुप्ता ने मानवाधिकार आयोग रो सदस्य बणायो ग्यो है। आ दोनां री नियुक्ति पद धारण करणे री तारीख सुं तीन बरस री अवधि या 70 बरस पूरी करणे ताई है, जकि भी पैले हो बी बकत ताई करीजी है।

000

आकाशवाणी समाचार जयपुर री कानी सुं प्रादेशिक समाचार बुलेटिनां मांय तीन नुवां आपराधिक कानूनां रे बारा मांय जागरुकता लाणे रे लखस सुं श्रृंखला चलायी जा री है। आज म्हे आप ने इण कानून मांय फोरेंसिक रो महत्त्व बधाणे खातिर कर्या गया उपयां रे बारा मांय बता रह्या हा। इण रे तैत 7 बरस या इण सुं बत्ती सजा प्रावधान रे अपराधा खातिर फोरेंसिक जांच ने अनिवार्य कर्यो ग्यो है। सगळा राज्यां अर केन्द्र शासित प्रदेशां मांय 5 सालां रे भीतर फोरेंसिक रो बुनियादी ढांचो तियार व्हेला। मैन पावर खातिर राज्यां मांय फोरेंसिक यूनिवर्सिटी री सरुआत व्हेला अर फोरेंसिक इंफास्ट्रक्चर ने मजबूत करण खातिर न्यारी-न्यारी जगावां माथे लैब थापित करी जावेली।

000

विश्व जनसंख्या दिवस रे मौके माथे **चिकित्सा अर स्वास्थ्य महकमो** जागरुकता कार्यक्रम री सरुआत कर दी है। ओ दिवस दो चरणां मांय मनायो जावेलो, जिण मांय म्हीनेभर ताई हर पखवाड़ां मांय खासा कार्यक्रम व्हेला। स्वास्थ्य महकमां रा अहलकार बतायो कि छोटे पिरवार अर टॉबरां मांय आतरो राखणे खातिर जागरुक करणे सारु **मोबिलाइजेशन पखवाड़ा** आज सुं शुरू हो गया है। ओ 10 जुलाई ताई चालेला।

सेवा प्रदान पखवाड़ा 11 सुं 24 जुलाई ताई मनायो जावेलो। मोबिलाइजेशन पखवाड़े रे तैत स्वास्थ्य कार्यकर्ता, आशा सहयोगिनियो, आंगनबाड़ी कार्यकर्तावां री कानी सुं आप रे खेतर मांय न्यारी-न्यारी गतिविधियां राखी जावेली। आ रे कानी सुं योग्य दंपतियां सुं संपर्क कर छोटे पिरवार रो फायदो पैले अर दूजे टॉबर मांय कम सुं कम तीन बरस रो आतरो **अंतरा गर्भनिरोधक इन्जेक्शन**, परिवार कल्याण सेवावां अर मोटयारां री पिरवार नियोजन मांय सहभागिता माथे चोखे रूप से चर्चा करी जावेली। जिला अर ब्लॉक स्तर माथे **'विकसित भारत की नई पहचान, परिवार नियोजन हर दम्पति की शान'** थीम माथे कार्यक्रम व्हेला। 11 जुलाई सुं सरु होणे वाळे पखवाड़े ने **सेवा प्रदान पखवाड़ा** रा रूप मांय मनायो जावेलो। इण रे तैत जिला अर ब्लॉक स्तर माथे पिरवार विकास मेळा रा आयोजन कर र परिवार कल्याण साधनां रो प्रदर्शन व्हेला। अटे आवण वाळां लोगां ने परिवार कल्याण साधनां रे बारा मांय परामर्श दियो जावेलो। वणा बतायो की सगळा ब्लॉक माथे चिकित्सा टीमां कानी सुं पुरुष अर महिला नसबंदी शिविर राख्या जावेली।

000

उपमुख्यमंत्री दिया कुमारी आज राजभवन मांय राज्यपाल कलराज मिश्र सुं मुलाकात करी। राज्यपाल सुं आ वाणी शिष्टाचार भेंट ही।

000

खान सचिव आनन्दी प्रदेश मांय खनिजां री खोज रे काम मांय जुटी केन्द्र अर राज्य री संस्थावां सुं आपसी तालमेल अर सहयोग सुं खनिज खोज रे काम ने गति देणे रा हुकम दिया है। आज एक बैठक मांय वणा कह्यो की मेजर अर माइनर खनिज प्लॉटां री नीलामी मांय राजस्थान देश रा अग्रणी प्रदेशां मांय शुमार हो ग्यो है। वणा बतायो की बरस 24-25 मांय मेजर **मिनरल** रा 15 ब्लाक मांय सुं 9 ब्लॉक री माइनिंग लीज अर 6 री **कंपोजिट लाइसेंस** खातिर नीलामी करी जा चुकी है। इण रे अलावा लाइमस्टोन रा चार ब्लॉक री नीलामी 7 जुलाई ताई पूरी कर ली जावेली। बैठक मांय **जीएसआई** रा **निदेशक हरीश मिस्त्री** बतायो की **जीएसआई** कानी सुं

राज्य सरकार ने 39 जियोलोजिकल रिपोर्ट्स अर 45 जियोलोजिकल मेमोरेण्डम दिया गया है वठिने एम.ई.सी.एल. कानी सुं 42 जियोलोजिकल मेमोरेण्डम दिया गया है।

000

केंद्रीय अन्वेषण ब्यूरो नीट-यूजी परीक्षा मांय कथित अनियमिततावां रा बारा मांय दो जणा ने गिरफ्तार कर्यो है। अधिकारिक सूत्रां बतायो कि आं दोन्यु आरोपियां ने बिहार रा पटना सुं हिरासत मांय लियो गयो। नीट-यूजी प्रश्न पानो लीक मामलां री अधिकारिक तौर पर सीबीआई जांच कर री है।

000

प्रदेश मांय मानसून सक्रिय होणे सुं लगतार बिरखा रो दौर जारी है। सलूंबर मांय तेज हवावां रे साथे आज भी केई गांवां मांय बिरखा व्ही। राजसमंद जिला माय बिरखा सुं खेतां मांय पाणी जमा हो गयो हो। डीग जिला मांय लगतार बिरखा रे पाछे काश्तकार बुवाई रो काम शुरू कर दियो है। डूंगरपुर मांय दोपहरां पाछे हल्की बिरखा व्ही। इण रे आलावा सिरोही, उदयपुर, बांसवाड़ा अर प्रतापगढ़ जिलां मांय कठी कठी हल्की सुं मध्यम बिरखा रा समचार है। दूजी कानी केई जिलां मांय गर्मी अर उमस रो असर रह्यो। मौसम केंद्र जयपुर कह्यो है की आज राजधानी जयपुर मांय भी मानसून पहुंच गयो है। मानसून प्रदेश रा दक्षिणी पूर्वी भागां मांय आगे बध्यो है। मौसम महकमां रे मुजब लारला 24 घंटां मांय पूर्वी-धौलपुर, ब्यावर, भरतपुर, भीलवाड़ा, टोंक, जयपुर अर कोटा जिलां मांय कठी भारी अर कठी-कठी घणी तेज बिरखा दर्ज करी ज्यी है। सब सुं बत्ती बिरखा धौलपुर मांय 131 मिलीमीटर दर्ज करी ज्यी है। मौसम महकमां रे मुजब आवता तीन-चार दिनां मांय राज्य रा केई और हलकां मांय मॉनसून ने आगे बधाणे खातिर परिस्थितियां बरोबर है।

.....